

5 Ada housh naut gish ga tkulhukwaulimlthk gaga, Ligi gaulth hou dā gwashim, ada wal shim.

6 Ada daush ga gaul dit ga guldum akshum laup ga, dī wilalaum shikshakshinshk gish ga Jews ga, meltha gō'bel ligi gwili shinlth guldum'oulth shga dikdauyint.

7 Ada housh Jesus gish dupniat, Hanhon guldum aksha dalth aksh. Ada shimt gun hūkwalukshint ga.

8 Ada houit gish dupniat, Shu'una ma shim guzit, ada ma shim ginam da miyān lūalgiadit. Adat wilāgwut ga.

9 Ada lthat bakt ga miyānsh ga lūalgiat ga aksh ga nat sha winet ga, ada althgat wilailth wil wātē gut (ada alt wilait ga tkulhukwaulimlthk gaga nat in guzish ga aksh), ada wilt lūit gut ga miyānsh ga lūalgiat ga shūnakshīt ga.

10 Ada houit gish niat, Tkānī giadit in ksl gauga ām da winet; ada lthat gilgialūqush dit, ada wil dīt gian na wil hadak ga dit: ada ma al yagai kshītkulān da na wil ām dit.

11 Nīnīsh ga wilhīshidāmash ga shinlaiduksh ga wālsh Jesus gish Cāna'um Galilee ga, adat alūdā'ansh ga na hoishk gut ga, ada shimhoudiksh ga na disciples gut gish niat.

12 Ltha goudi gwa ada wilt tiki-hapsh ga Capernaum ga, niat ga, dīsh naut ga, dīlth waikiat ga, dīlth disciples gut ga: ada althga hēldlth shalth wandit.

13 Ada ltha dadalupk gish ga dum Passoversh ga Jews ga, ada wilt magaut gut Jesus ga Jerusalem ga.

14 Adat witwāsh ga t'in hūwādīsh gamīshmūsh ga dīlth matī dīlth doves gish ga zum temple ga, dīlth wil lūwānsh ga leshitiāmushgum dālāt ga:

15 Ada lthat zapsh ga hāwuneza-

gushgum hagwilhō ga, ada wilt kshahūunsh ga tkānīsh ga na lūwālth gish ga zum temple ga, dīlth matī ga dīlth mīshmūsh ga; adat shagulgoldash ga naga dālāsh ga hūkle-shitiāmush gut ga, adat gilipaioish ga halitkawk gaga;

16 Ada houit gish ga t'in hūwādīsh ga doves ga, Kshadoga gwa; gilau sha wālp wā'atk ga shim da na wālpsh ga Nagwādī ga.

17 Adat a'abugat ga disciples ga na damtk gut ga, lthat zalthū hēkul da wila wāl na wālbunt.

18 Ada dīlamak gish ga Jews ga ada houit gish niat, Gau shinlaiduksha gwuniazun dā gum, gunwānī a gwa?

19 Ada dīlamak gish Jesus ga ada houit gish dupniat, Golda temple gwa, ada am gwili sha ada n'dum gik hai'in dit.

20 Nīnīsh ga gunhoush ga Jews ga, Tkālpka wil giap da gaul da gaulthat zaba temple gwa, ada al ma dum hai'in dalth gwili dalth sha hī?

21 Ada al na templeum tkamaut ga nahouit ga.

22 Gun ltha gik giuiuntk gut gish ga wātē gut gish ga shpagait dūit ga; adat a'abugat ga disciples gut ga na houit ga gwai ash dupniat ga; ada shimhoudikshīt gish ga N'lthōdukshum Damīsh ga, dīlth algiak ga na housh Jesus ga.

23 Wai ltha dhāt gish ga Jerusalem gish ga wil Passover ga, ash ga halilūalgiat ga, wihēlt ga shimhoudikshīt gish ga na wāt ga, lthat nīsh ga shinlaiduksh ga wālth ga.

24 Ada al althga waiyauksh gish Jesus ash dupniat, āwilt wilaish ga tkānīsh ga giat ga,

25 Awil althga dum dīt shiluk magaunda dit ligit nāith wila wālth giat ash niat; āwil lthat wilai gau lūwāl didā giadit.